

Tuesday, October 21, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

UNION MINISTER

Union Minister Kiren Rijiju chuan vawiin hian zan khat riakin Mizoram a rawn tlawh dawn a, Dampa bial by-election neih turah BJP Party tan hmun hrang hrangah a campaign ang.

Union Minister hian vawiin chawhnu khan Lengpui Airport lo tumin hemi hnu hian West Phaileng a pan dawn a, West Phaileng ah hian vantlang inkhawmah thusawiin bialchhunga mi hrang hrang a kawm dawn a, tlai lamah Aizawl lo letin Hotel Regency ah thuthar thehdarhtute a kawm dawn a ni.

Union Minister Kiren Rijiju hian naktukah Reiek a tlawh dawn a, Reiek ah hian vantlang inkhawm a hmanpui dawn bakah Dampa Bial by-election atana BJP campaign hun ruat hrang hrang a hmanpui dawn a ni.

BJP Party hian kum 2023 a he lai biala Congress candidate, tunhnai a an party zawmtu Pu Lalhmingthanga chu an vawrh chhuak a, Congress in Minister hlui Pu John Rotluangliana an candidate a. MNF chuan an party senior vice president leh Minister hlui Dr. R. Lalthangliana dintirin ZPM atangin kum 2023 inthlana tling zo tawh lo Pu Vanlalsailova an din nawn tir leh bawh a. Candidate leh party hrang hrangte hian vote zawn beihpui an thlak mek a ni.

Dampa assembly bial bye-election a tul chhan chu July ni 21-a helai bialtu MLA Pu Lalrintluanga Sailo MNF a thih vang a ni a. Bye-election atan hian November ni 11 khian vote thlak a ni ang a, November ni 14-ah vote chhiar a ni dawn a ni.



DAMPA BY - ELECTION

Dampa Bial MLA By-election neih tura chuh tumte tan vawiin tlai dar 3 thleng hming thehluh theih a ni a; vawiin chawhnu dar 2 thleng kha chuan Bhartiya Janata Party (BJP), Indian National Congress (INC), MNF leh rorellai ZPM candidate chuan chuh turin Returining officer Pu Malsawmzuala hnenah an hming an pelut tawh a ni.

Vawiin chawhnu dar 3 thleng hming pekluh theih a ni a, hming pek luhte hi naktukah endik an ni dawn a, Candidate-te inhnuhdawh theih hun hnukung atan October ni 24, 2025 ruat a ni.

Inthlan chu turin BJP Candidate Pu Lalhmingthanga, INC candidate Pu John Rotluangliana, MNF candidate Dr R Lalthangliana leh ZPM candidate Pu Vanlalsailova-ten hming an thehlut tawh a; PC party chuan nimin khan an candidate

atan Pu K. Zahmingthanga chu puang tawh mah se, vawiin chawhnu dar 2 thleng kha chuan hming an la thehlut lo nia thudawn a ni.

Dampa Bialah hian vote thlakna hmun (polling station) 1,276 a awm a, Dampa Bial chhungmi vote nei mipa 10,605 leh hmeichhia 10,185 bakah, sorkar hnathawk (service voter) mipa 111 leh hmeichhia 4 an awm a; vote nei zawng zawng hi an vaiin mi 20,905 niin, mipa 10,716 leh hmeichhia 10,189 an ni.



CEO

Chief Electoral Officer Dr Lalrozama chuan November ni 11, 2025-a Dampa Bial MLA By-Election neih tur atan tuang takin inbuatsaihna a kal chho mek tih a sawi a; inthlan hun puan atanga vawiin thlengin inthlan inkaihhruaina, Model Code of Conduct (MCC) kaihhnawihah zualkona (complaint) a la awm loh thu a sawi.

Dr Lalrozama hnen atanga Akashvani Aizawl-in thu a dawn danin, tun dinhmunah MCC bawhchhiatna emaw, zualkona emaw an la dawn loh thu a sawi a; Dampa bial mipui, political party, NGO leh sorkar inkarah thawhhona tha tak a awm thu sawiin, inthlan zawhfel thlengin thawhhona tha hi awm zel se, inthlanna hlawhtling tak awm ngei se a duh thu a sawi a ni.

MCC chungchangah complaint nei tan ziakin inthlan kaihhnawih sorkar hotute hnenah thlen thrih a nih thu sawiin Dr Lalrozama chuan, cVIGIL mobile app hmangin android leh ISO phone hmangtuten hmun leh hmun atangin complaint duh an neihte chu a thlalak leh video-te nen an thehlut thei a ti a, cVIGIL chu hmang tangkai theuh turin mitin a ngen nghal bawk.

Election lam atang chuan Political party tinten rualkhai tak leh inbuktawk takin campaign-na hun leh hmun tha nei se tih chu an duh dan a nih thu Chief Electoral Officer chuan a sawi a; tun dinhmunah chuan political party-te pawhin tha takin dan hnuaiah campaign an kalpui nia an hriat thu leh an lawmthu a sawi a; complaint an dawn erawh chuan a rang thei ang bera hma la nghal turin flying squad an indah vek thu a sawi.

Dr Lalrozama chuan political party tinin star campaigner 40 theuh an inruat theih thu leh CEO-ah an star campaigner turte list an thehluh tawh thu a sawi a; ECI lam atangin hotu pathhumin Dampa bial an thlen tawh thu leh anni pawhin an tih tur angte tuang taka an tih zel an beisei thu a sawi bawk.



POLICE COMMEMORATION DAY

Vawiin October ni 21 hi India ram pumah an duty laia thi police-te s̄unna hun 'Police Commemoration Day' a ni a, Mizoramah pawh hmun hrang hrangah hman niin, Aizawlah chuan 1st Bn. MAP Headquarters, Armed Veng, Aizawl-a martarte thlanah police thite s̄unna leh zahna chibai b̄ukna hun hman a ni.

Commemoration Day-ah hian India rama September ni 1, 2024 leh August 31, 2025 inkara duty laia police thi mi 191-te hming chhiar chhuah a ni a, anmahni s̄unna hun hman a ni. Kum 1966 atanga nimin thlengin Mizoram Police zingah, duty laia nunna chan mi 54 an awm tawh a ni.

Aizawla Commemoration Day hmannaah hian Mizoram Police senior officer-te bakah CRPF, SIB leh Assam Rifles atanga officer pawimawh lo kalte nen urhsun takin martarte sunna neih niin, martar thlanah zahna pangpar dah a ni a; Mizorama Police hmunpui hrang hrang, District Headquarters leh Battalion Headquarters-ahte Commemoration Parade hi hman a ni bawk.

October ni 21, 1959 khan ralthuam nena India rama rawn lutru China sipaite chuan India ram veng mektu India police-te chu Hot Springs (Ladakh)-ah an lambun a, India police 10 an thi. He ní hi ram tana nun hlantu police-te hriatrengna ni, Police Commemoration Day atan sorkar laipui chuan a puang a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



GST REFORMS

Prime Minister Narendra Modi a’n thla hmasa ni 22 a GST rate thar tihchhuah chuan mipui te ah hlawkna a thlen mek zel a ti a, vawiin chuan GST rate thar in stationery bungrua a nghawng a neih dan hrang hrang kan tarlang dawn a ni.

Sawrkhar in GST rate thar a tihchhuah chuan mipui te ah hlawkna thlen mek in, pencil, pensilzumna, rawng, leh lehkhabu, graph paper, map leh chart paper ah te chhiah lak a ti tawp a, heng te hi ahma a zaa 12 lak thinna a ni. Heng bakah hian nawhrehna ah pawh zaa5 lak thinna ah chhiah lak tih tawp ani a, he dan thar avang hian zirlai te leh ram mipui ten man man zawk in thil an lei theih phah a, sum sen ti tlem in zirlai naupang te leh nu leh pa te ah hlawkna nasa tak a thlen a ni.

